

芝園文稿卷之五

閩中趙世顯仁甫著

李承爵子脩校

序文

賀新繁孫令公序

今天下所稱至難爲者惟守若令而令爲尤難
夫守主治者也而令乃分治譬則守握其綱而
令理其目守總其權衡而令則持籌而筭之纖
悉及焉者也故以警式川難以孚衆志

則拊循難以作士風，以扞難，以奉大吏，則趨承難，故加之以威嚴，則以為厲，已被之以柔和，則以為畏，已稍戾其欲，則以為矯拂，而不情守正，弗阿則以為長傲，而倨侮信乎！令之難為矣。乃予觀于孫公之治繁，特易易焉，何哉？蓋公以高魁鴻抱，令于茲邑，以經飾吏，以正格物，以平易近民，以忠謹事上，賦足而民安，且愛焉，化行而士安，且敬焉，德博而故老安，且悅焉，忠肅孚而大吏安，且信焉，以故問俗，則頌聲翔洽，觀風則薦剡交馳，考績則天語褒嘉，龍章炳煥，寵賚後先，以公之德之才，從此陟華要，升台鼎，柱石六朝，皆若轉丸，峻坂駕輕車，而就康莊，無難者於治繁，夫何有故？曰：不遇盤錯，罔別利器，而牛刀小試，則又聖門所以深致意於子游者，公也。異日尚以予言為左券哉。

送徐司理序

蓋聞李官之難有三，而明刑不與焉。夫李官者，臺臣之所寄耳目，其職之略，不賢於是乎。

燭衆言之當否於身

耳本稽核於是乎資刑

獄之出入於是乎賴察見淵魚則下吏病其苛
摸稜而進之則上以爲不任難一也稽核之牒
一下單車而詣郡邑若帑若庾若甲兵若城垣
邨舍若衽席帷帳鞍馬若庶人在官者若纍而
繫者若簿牒之詳且略者近而遠者一一周視
綜覈而報命焉難二也大中丞若部使者以及
監司不決之獄兩造之詞漏網之吞舟靡弗咨
而剖焉或甲可而乙否或今是而昨非或彼符
而此異向背興於毫芒愛憎殊於旦夕譽毀懸
於叵測難三也有是三難卽智而賢者處之猶
憚折手而投足焉惟徐公則不然聰明才辯守
之以靜默舛紛填委待之以安詳可否是非符
異一付之無心而惟吾理之安吾見之審焉故
能易人之難而歷四年如一日也公惟其然以
故遠邇興神明之頌臺憲勤登薦之章主上
錫褒封之典茲且晉黃門青瑣而馴陟台階疇
匪諸難之歷試者歟予素愛慕公之深而

芝園文集卷五
重違諸文學之請故其少其事而亟稱之若其
祥刑不寃則有潯人之口碑在

送夏以舜邑簿歸省序

趙子曰曩予司理池陽視帑于六合卽聞有父
江夏君其人溫醇孝友侗儻不羣憾未判識逮
予左宦量移高粱君業簿是邦予一覲見把臂
驩甚察其爲人果渾然雅厚謙抑冲夷至於任
事警敏周詳要歸於正直梁固孔道君蚤夜拮
据送迂當上人心拊循孚衆志甫三載臺使者

三旌之右遷可跂足俟惟君則以慈親垂雪遠
不能從日夕瞻雲繫念曰登不忍以綺繡服易
斑荆也歸志頻興乃儕輩輒阻止之謂士君子
旣已委質爲臣矣弗主恩之報塞而圖膝下驩
於予情得矣如臣職何夏君聞而強就事嬰思
寢以成疾遂飄然欲謝去然當事者猶難之且
士庶之願留者牘亦數十上夏君志弗克遂故
卧痾齋閣中凡三閱月復投牒監司請監司憐
其請力稍領之夏君不待報買三峽權東

歸噫嘻世之人以仕爲進徃徃蕩而忘返甚至
絕裾以干祿若梁公之睇雲王陽之迴馭陶潛
之賦歸大孝高致求之輒近卒難其人此無他
利祿膠其中紛華染於外也夏君始移其報親
之心以報君旣歛其奉身之榮以奉母庶幾有
古之遺風焉予向所聞君子池陽者今左契合
矣能不樂道而喜談之是爲序

周震川復姓序

外史氏曰余觀周君之復姓也有三善焉重本
一也明宗二也勵俗三也余聞之先王之祭川
也先河易曰本乎天者親上本乎地者親下本
之不可忽也如此今周昌王姓幾四世矣周君
卓然以科名顯失今不復報本之謂何且也王
族尚繁周之祀不絕如綫有水木之恩者能無
慨乎始焉以王易周終之反王爲周稱王大父
自阿中始世系考本始昭矣故予多君之能重
本也余又聞之別子爲祖繼別爲宗繼禰爲小
宗此宗法也今周之於王爲繼禰乎繼別乎瘦

綴蘿附揆諸義則靡合稽諸禮則弗經君唯周而不王也庶乎族屬明世次辨枝分派別倫序森然而宗法正無相瀆矣故曰君之復姓以明宗也今夫世之宵夫下流利人之貴富以耀潤其身徃徃棄本宗從他姓而于越爲甚越中多贅婿贅婿之子之姓率從外氏如子贅甲則子之從甲孫贅乙則孫之子復從乙一門之中根同姓別芬若絲縷甚哉其害義傷教而俗不長厚也君之復爲周也凡同此情者能無感乎

感則思思則必相率而爲不遠之復然則君之復姓也其有裨于風教甚鉅偉矣周君其世所稱也行君子哉昔崇韜拜子儀之墓識者非之而劉以賜婁李以賜徐君子且以爲亂命矣周君矚然燭於理毅然不搖于俗可不謂仁人孝子乎哉要之則一念重本之思有以君之也且君早沾一命而卽挂冠又善於馭氣攝生暇則以故業課厥子予嘗睹若子之文詞燁燁將亢宗也夫勇退則名完矣生攝則身全矣子賢則

後裕矣凡此皆所以無忝于先人而惓惓於重本者噫若周君者可多得哉可多得哉君名國賓別號震川以鄉進士官文學周其復姓云

賀節推陳公膺司徒嘉命序

代

古今所稱至難理者非刑獄哉匪明則平反失宜匪公則出入惟已抑或明矣而苞苴障之公矣而刻酷繼之昧碩鼠之占而蹈蒼鷹之轍黔首嗷嗷不堪命矣故方情之未得則明難情既得則公難明而無障公而無暴難之難者也若

今之陳公其人矣公以弱冠登高第司理嘉禾昭寃釋滯獄無淹人庭無留牘何其明也無曲護無偏聽惟欽惟莊如衡斯平如繩斯直何其公也然而公之心恒歎歎然惟弗明且公是懼嘗語人曰治獄可修因果與其殺不辜寧失不經此無論哀矜雖雖然鸞鳳矣門生故識間有請謁者公大書于門一切謝絕之此無論四知卽欲干以私者靡不半途返矣以故少司徒汪公大器重公特加禮焉夫國家莫重於刑獄而

公咸理之得宜士大夫莫貴於繁庶而公無纖毫累焉之才也之操也可不謂難乎哉昔者蘇子容推府南中歐陽公稱其處事精審一以府政委之今予承乏茲土遠媿歐公而公視子容奚啻伯仲何論司徒公禮之卽鄙人實寵賴之矣矧今 聖帝良弼綜覈郡寮需賢若渴如公者且將有聞於當宁入而爲股肱耳目肩重燭遐其秩益顯其建樹當益宏其寵榮又當益懋其見知而禮重之者抑匪特司徒公也

芝園文稿卷之五終

芝園文稿卷之六

閩中趙世顯仁甫著

李承爵子脩校

記

遊逸園記

歲辛卯春仲過芾斯宗侯逸園時暮色侵人乃
移燈閱諸景殆子美所謂花似霧中看者詰朝
卒卒成別則又恍然若夢遊蓬島也私心每與
再過獲罄歡悰比丞夏復入豫章芾斯爲予掃

芝園文雅卷六
徑延款共酌又玄亭酒半自委蛇處歷紅蘭牖
過竹下草堂望藜桂臺歌淮南招隱聲琅琅若
出金石已而適清淨居入芸室室中插架牙籤
不下萬軸皆芾斯手自校讎者相與譚誦久之
出遊池上池類惠山方泉水澄碧可鑑雖名一
漑然雲影天光豁人心目且也觀魚則與濠上
之懷舉觴則恍高陽之侶揮毫則踵曲水之踪
殆無俟芾斯投轄而留乃予自徘徊不能去於
是把酒盡懽霑醉成詠索筆記述用表竒觀云

署園記

凡郡國理署多別設獨池署稍聯內寢署東南
有園畝十而羸郡僚案政暇每觴于斯向不名
余至扁其門曰共適竊附古人偕樂之義入門
折而東百數十步有池池廣視園可十之二格
其半植芙蓉半種魚數百名之曰生生以潛者
植者咸資生焉抑爲李官寓矜恹意也池之上
有亭翼如舊名澄然志潔也自門而逶迤達於
亭者爲古柳徑柳之人不啻十圍春日藏鶯睨

睨如簧爲壺觴勸長夏垂蔭南薰時播几席間
翠色與亭掩映如油幕藉令桓大司馬見之當
以喜易悲也亭之東有小橋如虹曰片虹度橋
得隙地余別構一小亭扁之曰吾兼取杜少陵
語也亭西向其南有桑數本苧茸茸然可供家
之人蠶絲織紵曰桑苧坡由虹橋轉而北數十
武高梧森然宜月碧篠數百個宜雨宜露宜風
余聞鳳故非竹實弗食非梧弗棲也名之曰棲
鳳巖由巖畔循池北度葦岸入平坡有石鏡如
几如可憇可觴間卧五絃鼓之聲鏗鏗然與石
相嚮答曰揮絃取嵇叔夜目送歸鴻手揮五絃
語又其地南面澄然亭抑有取於重華南薰之
操乎由此徑而南有桃數十本出池之西北當
春着花爛然娟娟爾河陽耶天台耶西母瑤池
耶武陵谿上耶曰桃花塢蓋園之勝在池池以
二亭愈益勝池故堙前二千石王公爲前吳郡
理資而濬之甃以石亭其上事具吳司理記中
迄余至則園頗就蕪亭稍仄沼之甃石巖然日

將圯矣余召工理而新之課園丁誅草萊汰瓦礫界畦掃徑疏洫種魚畜鶴居無何蕪者闢仄者整巖然者截然鮮可烹蔬可茹果實可薦桑苧可採擷花竹梧柳遊鱗舞鶴之勝可遊目可娛賓門幽徑深沼沚澄碧亭榭虛爽可散帙飛觴藝香滄茗鼓琴歌詠滌塵襟遠俗侶徜徉呼盧翩翩若仙也夫吏道與山林異若蒼素然藉第令抗塵容走俗狀而沉湎青紫以歿其身寧不爲五柳先生所姍笑余有毛義之喜爲貢禹之彈卽未得謝五斗申鷗鷺盟然幸署有此勝勝且邇內舍余出以理簿書雪冤滯入而御班爛捧卮酒上壽爲慈親歡間以其餘情寄樂於此夫非廊廟之江湖宦邸之故園人間之玄圃邪又奚俟挂冠焚魚而後得遂此懷也意所謂澄然吾兼云者庶几無負於是名矣爲之記綴以詠

豐樂園記

予癖嗜山水幸而宦迹所經輒有勝槩名園足

供嘯詠曩理池陽山則九華園則共適旣遷溢
浦匡廬密邇而有香雪高齋量移是邦則高粱
聳特蟠龍悶幽環治皆山竒秀可掬而其尤勝
者邸舍有園幾五畝園依北山而多脩竹山之
麓舊有亭名鳳至亭之陽得平岡予遣力誅草
萊手植梅李桃杏各數本名藏春塢由塢東南
行石磴坎坎蜿蜒穿竹而下爲千仞坡坡徑而
西南爲燕寢予至奉先始祖宋魏王先贈君東
衢府君像於此祠焉出寢歷西階而上爲翔鳳
樓樓有傍舍曰洗心軒軒北面鳳至亭時一憑
欄則北山諸景皆在眉睫間出此而南倚樓第
見萬壑爭竒羣峰列峙雉堞烟雲掩映巒光市
井縱橫盖邸中一大觀也自千仞坡又折而東
南有亭翼如肩斯樓而東出予葺而新之以其
前後多竹也故顏之曰鳴玉去亭數武爲一鑑
池予命左右繞池藝竹梅桃柳山梔側柏黃柑
枇杷杏李蘭桂匏荳桑柘之屬高下參差森芳
葱鬱每和風披拂霽月澄鮮樹色池光相爲映

帶清音幽馥種種宜人予每退食禮先魏王贈
君畢卽登樓騁望旣息念洗心軒輿至乃策短
筇登北山北窺阡陌南睇井邑已自千仞坡抵
鳴玉亭撫綠雲吸香雪濯清池坐涼風而吟素
月或察案萃止嘉賓臨况則滄茗開尊觥籌交
錯意與景會賓主都忘信可樂也因總名其園
曰豐樂蓋令之休戚視民民之樂在歲藉令歲
不豐民胥戚矣民旣戚令烏得而樂諸予泣梁
甫閱歲幸而大有年農鼓腹而歌於野行旅歌
於塗工歌於肆商歌於市士不絕弦誦聲四境
之內熙如也民樂矣予故得以樂其樂而豐樂
之名所由命焉

重立周顛仙告太平碑記

代

歲庚寅予奉 上命特繡斧按江右觀風至於
匡廬伏讀我 太祖高皇帝御製周顛仙碑文
巋然高出廬嶽語語金石與雲漢昭回日星同
炳也大哉 皇言上軼舜典湯銘何漢帝大風
敢望焉碑翼以亭亭畔舊有石鐫告太平三語

芝園文和卷六
今沒草萊斷廢烏有予慨然曰千古奇事是不
可復邪夫漢帝遇張良卒以定炎劉之鼎良猶
人間人也我 聖祖違顛仙殆天假以隆一統
之助且以太平告焉奇之奇者也可使之堙沒
不傳爾邪因重命立之俾億萬載爲我明太平
之輔與樂太平之民登茲山而覩斯石者咸知
太平之所自抑知天之所以開至聖者良非偶
然也

方塘釣叟亭記

曩予以典試事入蜀見蜀中之巖巒巒巒業奇峽
谿澗江流之奧窅幽深浩衍澎湃蓋匪特峨眉
劍閣巴江三峽灑灑瞿唐卽諸山衆流罔弗詭
狀殊態如前所云已仰而思俯而嘆也曰美哉
鬱乎斯固神禹所自興而尹王揚馬諸賢豪之
所由誕毓也輓近世雖不逮古然亦往往稱多
賢乃今復有羨於張翁云翁績學偉才暫躋名
場九萬翱翔有待未晚也乃一旦棄去築木園圍
疏池沼于邑治之南徜徉其間將終老焉以予

所睹記靖節柴桑蔣生三徑志和漁艇古人類
 匪玩物要有所寄以逸其心植其節耳翁即所
 居依山鑿塘延袤二百步許畜魚其中堤間襍
 植松柳花竹甃石為橋橋覆以亭趙文肅公顏
 其亭曰方塘釣叟翁日游息其中賦詩飲酒樂
 且以課諸孫子舉釣得魚或以供校藝罔以逸
 樂廢義方是翁之所有而元亮輩之所無也可
 不謂賢豪長者哉歲癸未翁子應登偕余成進
 士余又時時耳翁遺張君書也曰山林之事我
 為政廟堂之事汝為政汝第服官守樹勳烈以
 報主上俾汝父得享昇平即畊巖釣水無適
 不樂予將視斯亭如瀛洲蓬島矣汝其念之夫
 翁既不以逸廢教乃又不以榮易守信夫賢豪
 長者哉吾聞地以人重嚴陵一絲富春千古尚
 父竿竹棘澤名垂至今彼皆釣叟而地依以重
 若此然則張翁此亭行當與全蜀並志不朽矣
 區區漁釣云乎哉翁名瑤蜀之內江人余與翁
 子應登既同進士舉又同視天官政相得驩甚

耳翁之事甚詳乃操筆而記之

芝園文稿卷之六終

芝園文稿卷之七

閩中趙世顯仁甫著

李承爵子脩校

祭文

祭李太史文

維公幼秉慧質夙擅詞場人咸稱異謂嗣班揚
果掇巍科為邦國光賈生年少董子賢良木天
望重禁苑名揚厥有撰述左氏公羊從容講幄
下上虞唐掄才試院造就珪璋乃晉成均規模

孔臧豪英濟濟聲教洋洋 帝謂得公道化未
昌頃緣在告暫遠巖廊余宦斯土時陟公堂邇
聞公體亦既寧康方期再起翊贊 聖皇胡爲
仙馭遽返穹蒼鳳兮陡隱王也斯藏時微楷範
邦失棟梁嗚呼噫嘻壽莫可必名能久彰冉疾
顏促萬禩流芳公壽安在德業文章川流嶽峙
日耀星芒余敢謂公歿也不亡

祭封兵部員外陳公文代

於維我公身爲時範德重鄉評篤生賢胤爲邦
國楨蚤擢巍科出領州牧海甸澄清棠陰散綠
乃晉回省爲尚書郎戎兵克詰經畫巖廊載秉
文衡師法荆楚造就羣英篤周家祐令嗣克宦
惟公教成 帝錫公寵爲郎本兵德足延年方
期未慶受祿于天津津未竟胡然夫人先公告
逝再易星霜公隨繼之某也昔年幸遘令子俾
入藥籠濫厠參芷感師之厚爰逮師翁願翁之
壽若太山崇胡天靡常奪此令德忽聆遐音爲
我心惻嗚呼悲夫公雖歿矣我師聞望播滿清

時不日顯庸融履華要舟楫梅霖于公益耀生
膺寵遇歿有餘榮名垂奕世如日如星其黍分
符羈茲薄宦心邇迹遐徒增涕戀樽醑既清菲
肴既陳公鑒斯忱伏惟格歆

祭封刑部郎中金公文

代

於維我翁秉茲懿德謙恭惠和爲民儀則夙圖
閑佚抗志衡門載親隴畝賁于丘園爰抱遺經
以燕翼子既掇巍科亦登顯仕乃晉司寇爲尚
書郎刑獄平允播譽巖廊乃出于越爲天子使

衡鑑公平洗冤釋滯

帝嘉子績推恩逮公

秩郎署與子官同王祐槐庭于公門闕食報于
天無時可輟公年未艾樂且優游胡然遘疾遽
爾仙遊其忝同鄉情關忻戚耳公告徂能不於
邑陳牲酌醴以寫寸忱公如鑒斯尚其格歆

祭陳涵宇文

於維我公弱齡穎異嗜學攻文寒暄弗寘處身
制行孝友端莊外中輯睦罔替于常早蹶霜蹄
激而成疾愈奮潛修弗遑自佚歲在甲子爲龍

爲允余竊驥附同舉于鄉北上燕臺罔違知己
伯樂旣遐風胡已矣載返故國念我同聲聚首
旦夕爰締文盟荏苒十年余爲祿仕喪我先君
言歸桑梓公亦謁選與我同官因公乍返暫爾
邀驩公曰惟君爲弱子所余念子才許以長女
無何征旆西指芋江別公及壻涕下而雙鬢爾
武塘謂公將赴愷悌作人爲賢師傅何期停權
于彼清湖二豎扇虐遽爾告殂始耳而疑已而
衷駭疇謂天意竟如是哉搖搖素旄東返閩關
撫今思昔涕淚潺湲載刈我牲載酌我酒竭誠
致詞于靈之右公形在木公神在天鑒此哀悽
格于几筵

祭陳涵宇文

代

惟君德性篤厚貞良學窺墳典識洞虞黃行確
以恭才高而瞻中外載揚爲時之彥歲丁甲子
利用觀光某等顛鄙亦幸翱翔旣上南宮負竒
弗售罔違隨和孰珍璫玖風塵荏苒十易星霜
君乃謁選署博武塘矯矯神龍暫同屈蠖終與

芝園文集卷七
四
爲霖飛騰天路何期蒼昊忽替貞常善宜受福
反抵于殃迢迢旅途摇摇素旄孤寡竢然歸于
閩嶠嗚呼悲夫壽弗稱德官不滿才南金良璧
竟掩氛埃吾聞彼蒼祗須靜俟不干其身于其
孫子君之二胤如鳳如麟他年奮躍端爲君榮
君聞斯言庶几無憾薄薦一觴寫予哀感

祭舅文

代

嗟萬靈之總總兮咸稟命於蒼蒼旣貴賤之靡
定兮抑脩短之何常於惟靈之德性兮旣篤厚
而安莊處外中以罔慝兮有攸徃而咸臧早登
名于仕籍兮佐醜政而孔良旋挂冠而解組兮
托三徑以徜徉雖晚舉乎胤嗣兮儼鳳瑞而麟
祥羨優游於林壑兮更鶴筭之悠長偶全歸于
大化兮乘白雲于帝鄉余仰承乎慈母兮感情
愛于渭陽聞哀計之忽及兮傾涕泗以徬徨聊
刈牲而裂帛兮用以薦乎椒漿靈倘鑒于斯款
兮願來格而來嘗

祭葉茂才

代

予於葉君之逝也蓋傷夫蓋傷夫士君子之處世也不敢爲不才不能必才之果用爲名以自勵不能必名之果揚故智如賈而位弗顯德如顏而筭弗長每由今以數昔其報施之或爽吾誠不滿於蒼蒼嗟嗟傷夫君之賦性流動而方君之處家勤儉而臧順親敬友取重于鄉文藻煥發夙已壇場吾意君且爲龍爲光胡乃倏忽而云亡也嗟嗟傷夫親痛于堂子泣于傍妻妾遑遑隕涕于房吾耳君之病匪不可拯之膏肓而乃醫人之弗良也抑君厭世之塵垢而思與盧敖俱翔乎或帝天有命而欲與李賀齊芳乎嗟嗟傷夫神聖繼作仕途鵠張如君負抱矢銳弓強胡爲乎遽解天弢而藏也嗟嗟傷夫當年北邙松栢相望不媿于天死亦何妨彼生者之碌碌疇如歿世而名彰也矧君之胤嗣如彼其昌而翁解組旣壽而康君之食報行且未央余惟情聯姻婭烏容已於涕泗徬徨也載酌我醕載剖其羊君之靈爽庶几格嘗嗟嗟傷夫哀哉

祭大宗伯肖泉兄文

代

唯兄幼承家學夙稟慧質篤古脩詞流輩數匹
歲在乙未兄掇巍科鑿坡視草史局編摩道術
文章端方宏富中外咸稱仲舒賈傅德隆望重
乃晉成均雅正率屬愷悌作人爰陟太常勛勞
愈積載歷司空爲大宗伯父子昆弟並起熙朝
鸞皇鵬鸚接羽雲霄兄謂榮名弗可久處矯矯
二疏寔余儔侶乃謝簪紱賁于丘園徜徉三徑
天弗諼年踰古稀優游杖屨旣壽且康爲時
儀羽云胡二豎遽隱膏肓曾無幾何而兄告亡
嗟嗟傷哉兄之勲名光昭區宇方冀丹升作邦
霖雨何期維社陡失耆英乘彼白雲遊于太清
哲人云亡氣數攸係予也宗人能無隕涕我牲
旣陳我醑旣清諒此哀情徹于九京

祭施明府文

代

我邦儁良先後齊芳鬱然相望睠爾施族冠纓
簇簇甲于閩服逮公之身締我宗姻匪友寔親
公早奮拔聯掇科甲出宰于越敷政優游俗化

民休卓魯斯儔方期紆紫入佐 天子未綏福
祉胡乃遘讒遽爾挂冠歸奉父權厚于昆弟以
逮親識綢繆周悉誦公之恩未矢弗諼靡有間
言年踰知命祖孫稱慶庭闈鼎盛藜杖瑤觴三
徑相羊樂且未央胡天未定感此竒症公倏已
瞑嗚呼傷夫恹鄙之夫偷生罔徂如公篤厚宜
爾未壽胡然匪乂余等生平忝沐姻情耳計怛
怛思公容色有淚沾臆感愴靡極嗚呼傷哉魂
兮歸來鑒此悲哀有俎惟脯有酒惟魯公勿予
吐嗚呼哀哉

祭施明府六有年兄文

惟閩嶠之叢業兮鍾靈秀於斯人君夙擅乎異
質兮抱聖世之竒珍既詞藻之炳煥兮亦器識
之含弘貌于思而偉豁兮又復備此脩能辟騏
驥之駿良兮需鑒識而奮步旋盼別于伯樂兮
快馳騁於天路銜恩命于九重兮迺出宰乎百
里愷悌流而衆懷兮與卓魯而齊軌世方羨其
廉貞兮觸儉夫之攸忌荃不鑑茲中情兮感讒

說而棄寘惟百鍊而益剛兮胡能化爲繞指果
自信乎連城兮夫孰憂乎蠅矢與其以信而見
疑兮寧委組而去之彼五柳之娉節兮庶旦暮
而遇之世役役而弗息兮余不忍爲此態也苟
天倫之足娛兮卽鼎台吾何愛也忻嚴君之遐
齡兮酌春醕以介壽課孫子以正業兮與同氣
而相友朝抱琴以陟巘兮暮三徑以徜徉曠俛
仰其靡慙兮卽衡沁亦何妨白日忽其不淹兮
恙俄及乎崦嵫縣黎毀而失耀兮高棟撓而疇
支余惟仁人之永年兮君始踰乎知命夙脩姱
以應世兮設施其猶未竟抑昊蒼之靡定兮福
身後而悠長委華要而弗躋兮諒嗣彥以取償
余等感年誼之綢繆兮忍哲人之凋喪痛鵠雛
之夭滅兮駭燕雀之高颺履堂階而慘惻兮音
與容其繫思積悲憤而罔洩兮爰雪涕而陳詞
亂曰閩之水湯湯兮君之德清而皇兮胡天之
命靡有常兮君之父子方壽昌兮悠悠爾魂無
煩傷兮肅具我薦薦我漿兮靈之格洋洋兮

祭薛翔宇年兄文

唯歲丁乎甲子兮君寔舉于茲鄉吾儕忝附乎
鳳翻兮參天路以翱翔旣時命之靡齊兮升與
沉其殊致君抱璞而未售兮愈精進而弗貳日
月忽其易邁兮春與秋其不居荏苒踰乎十禩
兮君猶困乎公車僉謂大器之晚成兮若爨鼎
之久而貴也畜已極而大亨兮拔茅茹以其彙
也胡蒼蒼之寥廓兮宰脩短而靡定與衍數猶
未符兮沙白日而忽暝嗟歲月之無幾兮輒凋
喪予所知痛陳施之踵歿兮詎意君復繼之締
情好以方殷兮忍捐予而長往揮別袂猶靡堪
兮矧終隔乎泉壤驥未騁于萬里兮胡止步而
弗前拱壁忽其碎缺兮乃罔逮乎瓦全悵落木
之蕭蕭兮舞迴颺而淒惻軫容音之倏遐兮與
金素而相值余惟顏氏之短促兮名積久而愈
彰抑高華之未躋兮必後嗣之將張亂曰才之
鴻兮德之崇兮宜食報之豐兮君雖速隕厥躬
兮父子昆季方顯庸兮靈其罔怨且恫兮歆我

樽俎鑒我衷兮

祭張少師太翁文

代

天啓盛明篤生良輔爲漢丙魏爲商伊傅仰翊
聖皇俯奠四方式穀胤嗣爲龍爲光德以福徵
恩隆異數胡以基之曰由賢父 帝賜翁爵如
厥子官鶴鳴在陰鴻漸于磐壽考顯榮域中靡
兩輝映閭閻逍遙几杖方期遐筭邁彼廣成五
老中條茹和舍精云胡仙都倏爾遽返舟亡深
壑星隕蒲坂 聖主哀悼朝野驚悲相君君行
萬姓繫思僉云相君念予赤子襄事之餘無辭
再起在昔汾陽位高望崇歷廿四考願今與同
某等謏庸荷相君德耳翁之喪涕淚霑臆翁之
精神或依 帝鄉臨風薄薦靈爽洋洋

祭高存德文

維萬曆乙酉秋又九月十有二日高兄存德捐
館舍閱五十餘辰矣友弟某司理池陽時適稽
藏于皖偶爾聞訃不覺撫膺大慟嘔血幾絕已
而抱病病少間始得爲文而哭之曰嗚呼哀哉

吾存德兄壬午秋望與君為別何知斯別竟成
未訣嗚呼哀哉追惟蚤歲與子同游永言締好
膠漆綢繆辛酉之秋予忝入棘壯志未酬鬢序
偕卽歲丁甲子予薦鄉書別君江滸涕泗連如
五上春官輒復歸止知我不遭惟有鮑子維丁
丑歲祿仕武唐君來宦邸予况寔涼劔裝蕭然
告我以去耳君道病涕零如雨庚辰首序喪我
先人言旋故國研席重親予哀既殷君貧莫贍
室人告俎予資之殮壬午秋試予乃啓行聞君

棄置置實悵予情癸未南宮予倖見錄耳君內艱
亂我心曲客歲夏孟出理池陽書來云疾為爾
徬惶顧我一官祿入無幾雖割斗升烏能贍爾
私心自謂歲月悠悠報君有待予亦何尤疇識
彼蒼報施舛錯貽君奇疾莫可救藥聞君疾甚
再呼趙生百年萬里無替前盟嗚呼哀哉生平
與游疾不及侍豪氣昂然而今已矣跼脩顏夭
千古共嗟不謂困厄有如君邪嗚呼哀哉心知
既亡我生焉用冥冥夜臺憾不爾共念君嚴父

芝園文和卷七
已逼桑榆乳竅二子旦夕奚須我生須臾當爲
子所我身則遐實勞延佇臨風薄寄聊寫予情
遣使哀號如欲無生君之英靈日星河嶽予後
君亡敢負君託嗚呼哀哉生離死別憾與誰論
惟君念我時託夢魂

祭封監察御史徐公文

惟公既有此懿抱兮又重之以脩能胸懷坦
其夷曠兮藻思逸以騫騰弱齡從怙以遠適兮
乃稅駕于上都穀胤嗣以貞則兮蚤奮翮於天
衢初翱翔乎玉堂兮繼出持乎繡斧既司牧乎
江州兮轉秋霜而甘雨公旣膺乎天寵兮
佩豸服以煌煌逮庚寅之歲杪兮爰泣止乎潯
陽膝下欣而承歡兮爲春酒以介壽遙繫情乎
故都兮乃嚴駕而東首謂會稽之旣抵兮疇知
始屈乎錢塘暫息駕于蘭若兮狎棋酒而徜徉
云胡二豎之煽殃兮遽勿藥而告逝倏耳計而
驚心兮胥徬惶而隕涕夫胡忍於賢詰兮不令
躋乎期頤旣鍾秀於芝實兮奚中道而隕之雖

然齡望古稀今恩隆帝錫返魂梓里今食報焉
極伯旋陟乎台階今季行騁乎天步也世推本
乎毓成兮夫惟我公之故也延芳聞於不替
今復奚論乎彭殤矧先後之光裕今邁等夷而
顯揚亂曰禹穴峩峩兮淵水湯湯產哲人兮慧
而臧貽燕翼兮貴以昌魂歸來兮抵故鄉仰休
風兮山高水長尚饗

祭徐封君文代

維我公之懿行既雅厚而和平蚤從父以遊遨
暫息駕于上京穀賢胤以好脩夙邁衆而成名
既翱翔乎翰苑旋冠豸以揚聲逮出牧乎江州
沛惠澤於羣生公既沐乎寵褒乃繫心乎桑梓
迄庚寅之仲冬于潯陽乎涖止悵承歡之幾何
望會稽而歸只行甫及乎虎林忽遘疾而弗起
嗚呼傷哉天既假橋梓以會晤何乃遽使之參
差豈乍覲之不偶抑定數之難移某猥視學于
西江竊常懷乎懿矩誼既切乎通家情尤聯乎
鄉土倏耳計以愴衷慨音容之莫睹爰陳詞以

寫哀寄精誠於清酌

祭中丞邵公文

於維我公望隆柱石德本珪璋西川挺秀上國
翱翔三衢筮仕蹟紹甘棠繼主度支英聲載揚
晉陟銓部躋于太常清通簡要恭肅嚴莊忠勤
丕著天寵彌光榮登開府控制長江鯨鯢頓
息遠邇寧康方期壽考儀羽巖廊云胡遽疾遽
返蒼蒼某叨末屬耳計徬惶恭瞻素旄薄薦椒
漿公神如在庶幾格嘗

祭遽齋陳先生文

維萬曆某年月日我先師遽翁陳夫子亡數歲
矣門生某幸涖茲土感愴隕涕敬束牲載酒陳
詞寫哀登師之堂泣拜而致祭焉詞曰嗚呼我
師肇產名邦爲瑚璉器筮仕吾閩爲清白吏遭
時不辰媿夫敗類荼毒青衿淫刑自肆導師以
誣而師靡貳遂罹中傷杼投三至師乃拂衣棄
官如屣我師戒行傾城駭異何武去思峴山墜
淚某以樗材荷師獎異寸步而前皆師之賜耳

芝園文集卷七
師立園優游荷芰異且麗眉身為國瑞今斯來
斯師已云頓嗚呼痛哉我師既遐我思莫實登
師之堂幸瞻諸嗣鵠立鸞停山輝澤媚行且奮
翔成師之志嗚呼痛哉懷舊感恩我心如織未
竟厥詞涕泗先墜載酌醇醪載陳蔬食惟師格
嘗鑒其鄙意尚饗

祭高子元先生文

嗚呼嗟夫我公其有道之士乎公以司寇大夫
之子中丞之婿倘肯稍自抑損以儕流俗則富
可不貲而貴堪力致乃澹然自守至於簞瓢屢
空早歲馳聲黌序晚厭弃舉子業壹意篤古閉
門著述殆數十萬言聞人有異書必借借必手
自抄錄日諷誦以自娛一切聲利不以入于其
衷公洵哉有道之士也其於髫年締交令子公
一見卽加器重見予一善則色喜且惓惓誘之
進有一不善則力規之不少恕比予登第也公
每寓書以名世勛業相期許逮予被繁言乍返
公不予感而曰大丈夫直道宜然嗟夫公於某

匪特鮑管之知蓋有父師之誼焉公是時年八十有四某別公而之謫居猶望公之再見也柰何遽舍我長往吁嗟傷哉公之子某嘗資之公之孫某嘗字之及公之歿也予皆弗及視舍殮焉百年知己徒費夢思千里重泉幽明永隔興言及此能不痛心力疾脩詞臨風隕涕公鑒予衷悲何能已嗚呼哀哉

祭詹寅丈文

顯等於君秩共師儒情同昆弟君胡爲乎舍我長逝謂位稱德君德則厚而位則微謂仁必壽君仁則是而壽則非年方踰乎知命乘白雲而遽歸配微君以何恃胤匪君而孰依青氈無色寶劍藏輝雲連丹旄風生素幃幃蕭蕭以遠去旒慘慘以南飛多士憶其模範同儕思厥音徽痛乍別尚弗忍矧重泉其未違臨風醜酒涕泗霑衣惟君靈爽鑒此幾希

祭羅華字年兄文

惟芝草之挺生兮爲希世之靈瑞胡尤物之靡

常兮倏朝榮而夕瘁彼躋壽而頽夭兮乃自古
而嘆之感哲人之凋喪兮予惡容以弗悲惟君
既有此脩能兮又重之以姱節夙司李于閩邦
兮金甌渾其罔缺既誕膺乎天寵兮恩上
逮於二親謂宜旋陟乎臺省兮爰翱翔于要津
何期劔化于延平兮輝光鬱而靡煥魂渺渺而
東歸兮夜冥冥而猶未旦嗚呼哀哉昔見君於
潯兮策駟馬今哭君之靈兮潯之野昔度延兮
譚素心今思君兮涕霑襟奠椒觴兮陳桂醕靈
不來兮空延佇雲爲旗兮風爲馬度幾格兮南
山之下嗚呼哀哉

祭羅華宇文代

嗚呼脩短異軌昔人所悲君之云歿能不依依
制科早擢鄉國稱竒崑岡尺璧鄰林一枝司理
閩郡赫奕聲施寵膺自天封章夙地方期內召
瑣闥台司云胡凶問遽至於斯良玉頓缺芝草
倏萎其感年詛容嗟涕洟潯江森森白石離離
蕭蕭丹旆淒淒素帷含悲釃酒載黍陳犧匪曰

芝園文集卷七
盡物聊寓予私君神在天尚其鑒之

祭胡寵文

萬曆癸巳夏五月十九日梁山縣知縣趙念
受雇夫役胡寵客死小江祭以酒肴而哭之曰
嗟嗟爾寵爾雖賤卑皆吾赤子願爾安全樂壽
無已爾雖受人之雇實則爲我而來胡然遘疾
遽返泉臺葬爾於此嗚呼哀哉爾祭爾哭爾鑿
予懷嗚呼哀哉

嗚呼寵其得死所哉寵塹邑一野夫耳受梁
人王達雇直爲予肩輿抱病于雲陽未幾而
死雲陽簿魏允文予鄉人也資之棺予聞乃
捐俸遣人爲助其葬且恤其妻孥有雲陽民
李讓者施之葬地今予過此而酌之酒哭以
文視其冢突如可以未固寵之歿可無憾矣
寵其得死所哉

祭廖大參文

惟我公之醇懿兮鍾靈秀於通川蚤翱翔于
死兮迺奮跡乎金門屢奏績於度支今何知一

麾以出守公鎮宣而予理池兮式投情而締厚
倏萋菲之乍起兮予爲公以周旋旣雲霧之解
散兮天日朗其高懸時予反遘乎含沙兮乃與
公而判袂公晉陟乎楚藩兮予方落羽而流滯
頃量移乎梁邑兮獲瞻拜乎華堂爰締歡乎令
子兮時懸注乎衡湘方期投赤以無窮兮云胡
哀音之夙屆素旒慘其西指兮擁靈魂其于邁
吁嗟世途艱阻兮惟宦轍其尤嶮巖或處順而
履坦兮蒼蒼忽其妬之蹇予坎壈之備嘗兮不
謂公而罹此疚也豈天道靡常兮乃顏夭而躓
壽也惟達人之大觀兮等死生爲一道苟令德
之靡虧兮此身亦豈同於腐草亂曰翠屏峩峩
兮川水滔滔哲人萎兮風悲號痛今昔兮涕滂
淘覲胤嗣兮俱鳳毛奉聖善兮筭彌高益光大
兮膺寵褒寫哀臆兮荒詞慰靈兮新醪嗚呼哀
哉

祭陳壻文

嗚呼予與若父同薦于鄉方期世講歲月悠長

既乃筮仕繼予武唐未經宦邸倏爾云亡遺爾
二孤及爾寡母跋涉悲辛歸于故土母也芳年
不辭勞苦勵志撫孤家政是主迄爾成立我女
于歸琴瑟靜好祥鸞並飛婦姑勤劬梁案孟機
一男二女膝下攸依年踰而立齒髮既壯銳意
潛修克敦孝養母勵冰霜兒承几杖俯仰相安
神情怡暢謂宜壽考永保厥終云胡疾恙遽震
于躬匪德之衰實惟數窮天道罔測跖未顏凶
女心崩摧誓欲從死上有寡姑下有弱子弱子
堪憐寡姑相倚爲死輕身爲生強視念壻屢空
百費難支周身周棺予壻是資告成凶服代展
厥儀疇云菲薄權時之宜吁嗟悲夫仲氏雖殂
伯賢籍甚卹寡存孤微伯孰任將來繫念壻目
未瞑代爾致祝諒鑒予誠載酒于觴崇脯于俎
注目存亡涕零如雨嗚呼哀哉

祭廸功郎張辰樓先生文

吁嗟夫玄造兮叵測升沉通塞兮焉極惟先生
兮鍾靈秀庫九經兮窮二酉夙騰譽兮膠庠旣

芝園文集卷之七
振鐸兮鱣堂被桃李兮春風化青衿兮時雨耻
曳裾兮梁園望烟霞兮解組蔣徑兮徜徉菊松
兮儔伍秉堅貞兮骯髒躋八表兮優游踵顏樂
兮陋巷知天命兮何求令子兮玉立諸孫兮龍
螭既康兮且和勝侶兮相過譚霏雪兮罔息寫
胸臆兮成歌宜享年兮未艾胡遽返兮大羅稚
予遊兮函丈早謬膺兮稱賞弱翮兮幸奮飛爲
養兮山中歸痛慈闈兮倏弃背嗟先生兮復凋
喪賈涕兮霑裳傷心兮悵快絮酒兮束芻輸忱
哉

芝園文稿卷之七終

芝園文稿卷之八

閩中趙世顯仁甫著

李承爵子脩校

祭文

祭盛母文

嗚呼人孰無夫而夫人之夫登顯仕人孰無子而夫人之子為良士人孰無孫而夫人之孫為聞人又况問其年則七十有一也問其德則亦足以稱賢也之數者人得一焉猶以為難夫人

兼之謂之全歸無憾非歟余承乏茲土仰德最
殷方冀以夫人母儀婦行爲邦法程而今夫人
不可復作矣嗚呼

祭王太夫人文

代

於維夫人獨秉懿德柔嘉惠和閨門之則夙閑
姆訓聿歸亢宗婉變好合琴瑟笙鏞克繼前人
以蕤翼子善類與居芳鄰是處教成名立爲鳳
爲麟棠陰繡斧聲動朝紳行躡崇階以補衮職
移孝爲忠夫人之力某也何幸驥附鱗攀年情
世雅未矢弗諼銜命南來參藩兩浙 帝曰勞
止晉余司臬雁山堂宇瞻拜靡常興言逮此正
爾徬徨胡期夫人遽登仙籙曉鏡飛塵夜臺掩
玉測身東望川原鬱紆壽未稱德嗚呼悲夫布
悃陳詞致牲及醴嗟弗克躬臨風揮涕

祭高會嫂文

維年月日會嫂高門林氏謝世忽已兩浹旬矣
其謹以束芻絮酒酌而哭之以辭日瀦水湯湯
兮產雋良鍾於林兮阜而昌代金紫兮流厥芳

惟靈怙恃兮蚤失望靈備德兮婉而莊歸于高
兮侍帷房司食飲兮主衣裳奉翁姑兮肅以將
和琴瑟兮樂未央日舉案兮等鴻光育二胤兮
麟鳳翔爰式穀兮昭義方母儀寢寢兮陶與滂
事鍼紉兮日靡遑御荆布兮典珥璫甘貧苦兮
安厥常余儕夙忝兮登華堂視靈舅兮丈人行
締靈夫兮翰墨場聯休戚兮並暄涼行異靈兮
壽且康玉諸子兮成棟梁相厥夫兮升巖廊膺
朱翟兮輝以煌云胡二豎兮煽茲殃久疇病兮
慮以厓尚念二老兮炙與漿嗟孝敬兮靈所長
氣兀兀兮激以昂咸爲靈兮叩穹蒼轉災青兮
爲休祥奈何疾貞兮神已傷辟木蠹兮根爲戕
白雲一夕兮結成霜梧葉脫兮響寒蜚靈於斯
兮遊帝鄉外中切怛兮裂肝腸痛淑懿兮奚當
亡余等臨視兮涕盈眶東我帛兮割我羊列席
品兮倒清觴靈如在今兮孔洋洋鑒忱款兮來格
嘗

祭楊太夫人文

芝園文集卷八
嗚呼人孰無夫而夫人之夫偉烈鴻名輝照千
古人孰無子而夫人之子佐國承家經文緯武
人孰無孫而夫人之孫鸞翔鸞立某等同門人
孰弗壽而夫人之壽素髮朱翟康寧以久昔嬰
母賢矣難必其世之貴否柳母貴矣未必其孫
之顯厚關西之楊四世五公貴富顯厚矣未必
其壽且賢之籍籍在人口也夫人兼之凡人之
母疇出厥右乎稽諸今昔可多有乎婦行母儀
光前後乎夫人之沒其不朽乎某等揮淚登堂
刈牲薦酒夫人臨之真如在其上如在其左右
也嗚呼哀哉尚饗

祭龍門陳孺人

嗟嗟悲夫傷哉靈胡爲而遽棄人間事乎靈之
父於某爲同聲兄於某爲同籍夫於某爲同官
且同心而同德者也予之願靈壽考而康寧盖
嘗百倍于恒輩而忍見靈之棄人間事邪邇在
句曲耳靈之舉賢胤也則躍然爲君善喜而且
爲靈喜已而憇靈谷日從君善游竊計靈之母

子煦煦相樂已庸詎知驩慶無何凶計遽至烏
得不令人裂肝摧心涕之霏霏至於踵也嗟嗟
悲夫傷哉悠悠天壤疇無死生惟靈之弱齡竟
逝棄子之成立而弗之俟也寘父兄與夫之大
就而若罔聞也脩短殊科幽明未隔蓋玄室藏
春於玉臺掩玉自古而嘆之矧若靈者不尤可深
悼乎陳牲束帛薄薦一觴靈其不寐來格來嘗
尚饗

祭施太夫人文

代

嗚呼某等於施太夫人之謝世也竊有感於慈
孝之相成焉計施君之泣江州二年往矣薦獎
交馳聲華籍甚君不色喜曰吾親在遠祿仕之
謂何邇迓太夫人就養邸舍而後喜可知也曰
今而後知有庭闈之樂已庸詎知夫慶在廬也
吊卽在門娛彩亡幾何而寶婺光沈靈護倏瘁
君且慘然衰經矣嗟嗟悲夫傷哉雖然粵西潯
陽相距千里藉令君也天涯而太夫人牖下子
母之情隔幽明之路殊將存歿之痛深而終天

有餘憾視一見而訣其幸爲何如者惟君之孝
惟太夫人之慈相待有成乃爾君與太夫人皆
可無憾抑愛無窮而年有限則故不能已於悲
者某忝通家習知情慄薄陳牲醴以寫私衷嗚
呼

祭施太夫人文代

惟靈幽閑醇懿婉順貞良母儀罔慝婦行尤彰
早相夫君爲時瑚璉式穀胤嗣作棟明堂夙斑
爛之暫輟乃佐政于潯陽操潔清而罔玷聲積
久以彌芳惟聖善之在遠時矯首以徬徨旣安
車而往迂遂歡聚以相將居無何而遘疾倏還
歸于帝鄉豈慶吊之遞運抑聚散之無常蕭蕭
旅徯川遠山長形神仞怛徒御悲傷雖然年躋
耄耄孫子繁昌歿存寧順慈孝齊光誰其似之
日祥與姜榮施未艾食報無疆尚饗

祭施太母文

惟粵嶠之鍾靈兮實篤生乎淑媛夙于歸乎亢
宗兮產明時之俊彥早巍科而奮跡兮爲天朝

芝蘭文和卷八
之股肱邇佐郡於溢浦兮羗績懋而聲宏時悵
望乎飛雲今日縣情于千里乃結束乎安車兮
迂慈闈而來止爰發軔於嶺嶠兮旋稅駕於潯
陽母子煦煦以相樂兮舞萊綵于高堂春酒介
以無幾兮婺星倏其隱耀欣喜極而生悲兮易
歡庶而以吊嗟嗟悲夫傷哉公之奉母兮樂未
央持喪歸兮嶺海長士庶哀號兮卧轍淚簌簌
兮霑裳公重來兮何日粵西江右兮遙相望

祭李太夫人文

於維夫人夫祀鄉賢子登郎署孫擢魏科百福
總萃權署承歡樂事匪一子方報命便道抵
荆湓輿載移孟筭方拾旌旆搖搖鷁首戒發胡
期二豎煽茲虐焰鶴髻仙姿竟以不起渺渺長
江峩峩廬阜隕涕增悵哀音日隆某陡聞之且
悲且愕載醪崇牲哭于江臯引領仙權傷如之
何

祭李太夫人文

嗚呼富貴福澤人所難必倘可必矣而亦難齊

齊矣而疇能並享惟太夫人丈夫子孫咸爲國
華旣貴而富旣富而壽旣壽而康自荆來潯就
養權署綵衣斑髯日以歡娛咸期夫人躋于耄
耄誕膺 天寵用賁孫枝孰知歸權欲發仙旆
遽移忽從廬嶽返于瑤池烏得不令人望之而
悲也陳牲于俎醉酒江湄夫人之靈尚其鑒斯

祭彭太母文

有淑夫人曰惟純德家政允修壺範罔忒訓子
成名作邦司直旋陟大藩承麻靡極夙膺日帝
命寵錫馳封素髮就養悅豫春容板輿歡岳竹
笋邁宗胡天不弔倏遭閔凶廣柳南還哀情惻
愴重慘歸航風悲素幌湛湛青罇洋洋靈爽翼
翼以忱庶几來享

祭陳太母文

維靈蚤毓秀於華宗丁芳年而配德內助順而
克臧著閨闈之妙則慨所天之不待日愴惻以
傍徨堅志操而弗貳方烈日與秋霜茹冰蘗于
綺年以式穀乎令子勤訓廸以允熊甘勞瘁乎

機杼倏亂嗣之見背復拊督乎孫枝協外中于
輯睦貽族戚以隆施肩家政于一身戒辛勤而
謹飭咸懷慈而懾威歷始終而如一夙葆真而
履素躋耄耄以優游卽兒齒而皓領猶含飴而
理膾擅慈惠與康和宜脩算之逾百胡遽返乎
瑶池駭翔鸞而自適吁嗟夫靈之生也旣克全
乎竣節靈之歿也諒靡慙于往詰惟親聯于肺
附故悵悒乎遺簪爰割牲而薦醴倘來格而來
歆

竟聞易搖蠢茲七姓不忍斯湏冒塵天聽彼

縱輕狂汝亦太甚賴聖處分歸于底定永息
爾爭勿求偏勝守分安常忘私順應上下和睦
疆土清平內變罔作外患焉生長延爵土無替
徽名惟忠與孝為國之禎嗚呼天網恢張皇
綱振肅際海窮天疇弗賓服逆字跳梁粉軀糜
族關白歸誠轉禍為福殷鑒匪遙報施甚速傳
喜改圖易戒迷復棄短從長自貽戩穀予欽
帝命泣此遐荒祗揚威德寘爾平康忠言諄諄

芝園文集卷九
勿謂逆耳未堅乃心以報天子

採皇木祭神文

於維地產之才遴作天朝之用合抱無尺寸之
朽飽歷風霜挺出匪尋常之資直干霄漢出離
巖谷行作棟梁仰藉神庥俯垂默佑舉重若眇
等甘同鈞於一毛轉險爲夷下千尋猶平地齊聲
邪許爭誇赤電之馳并力推移同勝烏獲之任
運諸指掌匠石咸得呈能自在中流工師由茲
底績瞬息寧論千里飄颻直上九重以勝任而
當帝心被顯庸而成壯麗庶大木有裨大用而
微臣亦攄微忠矣尚饗

謝晴文

維一旣仲收穫紛紜淋霑弗息民憂孔殷賴神
之庥徼惠于帝陰霾四收雨雪開霽苴菽得穫
谷種堅完三農鼓腹四境騰歡匪曰人功寔惟
神芘粒我蒸民敢忘大惠

再禱雨文

前因不雨竭誠懇禱賴神之力大霈甘霖然沾

濡未幾亢暘如故黎民阻渴田野焦枯豈職之
愆終不可赦貽禍於民竟若是烈歟爲此待罪
再懇明神仰達上帝職願身當厥疚乞賜俯澤
生靈倘四野咸濡品物再潤職死之日猶生之
年

謝晴文

陰陽和而風雨時曰惟天道五穀熟而民人育
亦賴神庥祈禱之念方殷感應之機甚速往求
雨澤喜甘注之咸霑茲乞晴明卽陽和之普照
雖上天宥職之過以惠養斯民抑明神鑒令
之衷而照臨下土自此如雲之稼得穫而百室
旣盈一由茲苦雨之情轉歡而三農愜望反陰爲
霽_七職之力能然旋乾轉坤惟神之功乃爾在
梁民固宜報德而如職尤切銘心酌醴陳牲聊
申曝獻乘雲御氣鑒此丹忱

三禱雨文

自職涖梁禱雨者再祈晴者二感竭寸衷應不
踰日今者方春稍雨復尼農務難與心忡首疾

職睠時艱寧暇自佚敢祈明神惟民之恤爲請
于帝甘霖沛溢田畝霑濡慰此百室

三謝雨文

繫天司暘雨之柄而神操禍福之權惟暄潤之
以時斯黔黎之蒙福茲者農功載始偶然雨水
愆斯肅竇明神仰祈甘澍精誠甫達霈澤旋敷
播種之功可成田疇之望斯愜敢云職力寔藉
神庥敬竭鄙忱用酬明德伏惟歆格慰此瞻依

四禱雨文

方春耕作之時目今播種之候田疇旣易乃與
西成雨水愆期有妨東作此皆本職罪愆之種
種致茲下民顧望之嗷嗷惟神司土一方諒職
保民寸念懇祈冥力轉達帝聰大賜甘霖愜滿
三農之望用資樹藝行看五穀之登

四謝雨文

惟神佑此下民大敷靈雨膏澤沛然野無焦土
畝畝載潤田功可興嘉種獲播萬室歡騰職也
謏庸忝司民牧惟民阜康爲職介福覆載之內

芝園文粹卷九
受此弘施職之忻慶曷以逾斯白叟黃童咸思
報祀醴酒陳牲酌此甘澍

建社學祭土神文

建學興禮政務當先養正啓蒙聖功伊始苟溲
濡之無地縱模範以何施本縣舊有社學日久
寔感閭閻里巷靡有良師涵育薰陶卒無善術
不聞求我或納于邪遂致舞象之英頗恣野狐
之習司風化若能無慨然今擇隙地肅卜良辰
仰賴明神俯垂睿照默資冥力肇啓人文鳩工
勸材興美斯輪而美斯奩升堂入室將絃於斯
而誦於斯

高山堡新建二橋祭土神文

輿運徒扛王政之所不廢濟川利涉民務之所
必資惟水土平而始地有可與之利抑橋梁建
而後人無病涉之虞舊或難仍事如有待睠此
高山之堡適當流水之衝春夏橫溢路必繞乎
羊腸秋冬稍枯潦亦侵乎人膝不建維新之績
終非善後之圖矧職在保民自當爲民興利而

橋以濟險詎難伐石爲橋肅諏吉辰肇興工作
賴神默相轉險爲安趨暇值乎三時俾功成於
不日巒光隱映常通駟馬之車行旅謳歌聿啓
三陽之泰尚冀時填烏鵲開萬古之通津仍期
永奠青龍成一方之巨鎮

橋工成謝土文

十二月輿梁成傳之古昔千萬人攸往利喜自
今茲惟庶民之子來遂收功于不日駟車可策
堪誇司馬之題迷津旣通免致望洋之歎洵坦
夷有裨於利涉卽汎漲罔病于褰裳近者悅而
遠者來總訝龍游於落日往者過而來者續仍
思蟻渡於當年彼溱洧之乘輿可無用矣而維
揚之弦管行且聞之詎謗劣能裕乎濟川賴明
神默資其砥柱陳牲載醑敬率父老以答麻嘉
勒碑刻銘冀並山川而垂永久

再建梁西社學祭土神文

養蒙乃作聖之基建學實育才之地苟不多方
而設教何期小子以成人職業業以子民尤拳

奉於蒙養昔開東學既樂育之有資載睹西偏
猶逸居之可念爰求吉土肅卜良辰鳩工飭材
建作人之階序築堂考室闢養正之門墻敢告
明神肇興工作伏望相離輸之明巧夙有成功
煥土木之精華俾無債事庶樂羣敬業不患於
無方而成德達材於斯乎可異伏惟歆格鑒此
衷忱尚饗

五禱雨文

本縣累積愆尤輒招天譴前者祝融示警民居
焚燬數多日今栽插屆期雨澤猶未霑足農功
難就職抱憂惶爲此懇求神力上達帝聰大需
甘霖廣資潤澤俾東作得以成功庶西成於斯
有賴

禱雨祭玄天上帝文

惟神受命皇穹俯綏下土職司水府南嶽顯其
威靈樞運玄冥北極主其禍福茲者旱魃煽殃
商羊屏迹當春少雨入夏恒暘致四野半已焦
枯俾過時難於播種雖虔請禱未沛甘霖是職

有餘愆乃民遭荼毒伏望轉聞玉帝佑此黔黎
鼓之以雷霆潤之以風雨沛膏澤於無窮涸者
轉而潤枯者轉而榮庶田功之可就自惟冒昧
妄肆干求與鑒真誠仍憐迫切

斷髮剪爪禱雨牒神文

爲祈求雨澤事准某官某關稱本職夙慝上通
于天下延黎庶召此乾旱虔禱七日靈雨未敷
惟職之罪難以卒赦而遺民之害職敢倖生敬
將卑職毛髮爪甲摘下焚化以謝罪愆爲民祈
懇伏乞風雲輻輳雷雨交作沛澤四敷百畝均
潤職寧死滅亦所自甘爲此竭誠再申仰祈垂
鑒

謝玄天上帝文

入夏亢暘有妨東作嘉種未播難與西成職用
憂惶日勤懇禱賴神轉聞天闕俯賜甘霖雲雨
雷霆一時並作滂洵潤澤四野咸霑枯槁還榮
豈盈可望自非神力安能感而遂通惟是農氓
靡不欣然有喜職司民牧益感神庥酌醴陳牲

芝園文集卷九
聊申謝悃乘雲御氣鑒此真誠

五謝雨文

職三載分符四祈靈雨咸資神力獲濟生民茲
者入夏亢暘職用齋心虔禱懇祈有日甘澍未
敷自揣兇頑召斯災沴乃斷髮剪爪焚化以謝
罪愆仍蔬食徒行焦勞庶幾感格荷神不弃甘
雨仍霑膏澤普施五穀載潤雷霆交作四境咸
濡旋看南畝之成功竊喜西成之可冀荷茲霈
澤敢忘謝私聊展菲微伏惟歆饗

再斷爪髮禱雨牒神文

夏四月不雨職斷髮剪爪代民懇求幸獲甘霖
得遂播種茲復亢旱田疇向枯職齋沐步祈殫
竭忱悃近城間或得雨遠鄉猶未霑濡早穀雖
幸無虞餘禾恐難卒保四郊沟沟萬室遑遑豈
職戾慝卒不可原貽禍生靈其猶未已爲此再
斷爪髮以謝職愆如果孽猶已作罪難卒原寧
自滅亡免貽民害伏望明神體上帝之好生念
下民之愁苦憫百穀之憔悴憐卑職之懇忱乞

以至情轉塵天聽大敷甘澍俾遠邇均霑普潤
田禾庶豐登可望

再牒城隍神文

神理陰教職司陽教幽明雖別要以爲民興利
則均也職承乏三年禱雨者五皆賴神庥無祈
不應卽如今夏四月田野旱乾隨求輒雨播種
有資六月再旱祈請經旬間或雨及一區抑匪
久而輒止職用齋素徒步至斷髮爪焚化掩骸
恤死止殺省刑代民懇求備竭心力奈亢暘日

甚雷雨不興禾苗向枯黎民懇求卽伊耶之

慝上通于天然下民何罪神縱不宥職之過能
不重民之生民困未甦職當省愆然不能爲一
方得患禦災神亦失職矣血食廟祀之謂何惟
神亦盍引咎過請于天乞卽四合陰雲大敷雷
雨用致禾苗秀實衆庶更生不惟職獲少逭厥
責而神亦與有榮焉耳不然神亦何顏復見蒼
赤哉爲此懇切具牒

六謝雨文

夏秋以來旱乾頗久齋心步禱冥漠潛通一之日二之日一沛甘霖或南北或東西各霑潤澤年穀雖非全稔田疇半已收成奈此下民之欲無厭罔知上蒼之澤有數妄求不已訛言間興賴天不棄民而恩常及物鼓之潤之時田枯槁以霑濡油然沛然倏轉憂薄爲欣慶粒食庶幾無闕蒸黎藉以全生職司牧于一方敢忘情于百叩陳牲酌醴伸謝悃於斯須御氣乘雲異格歆於萬一尚饗

謝龍洞神文

惟神肇興漢代夙高肥遯之風特荷唐封嘗溥及民之澤每與雲而致雨輒御氣以行天茲以旱魃煽虐於高粱職代部民乞靈於洞府神方展駕雨卽隨車蟠龍倏變飛龍炎熇若掃潭水盡成法水甘澍如傾四野咸濡罔俟卜飛騰之石燕連朝灑潤奚須占起舞之商羊苗勃然興之矣穀不可勝食乎獲藉神庥實徵天幸詎寸衷之能格殆曠世之竒踪俯竭菲忱仰酬明德

芝蘭文集卷九
伏惟玄鑒慰此羣情尚饗

瘞枯骸文

枯骨無主歲久縱橫大蟻厭餘殊不忍
見因遍求而悉棺以瘞之

吁嗟斯人胡爲而生胡爲而死橫屍積骸遍此
山趾予忝司牧爾皆赤子何能憇然不爲爾所
爾棺爾瘞安爾泉臺魄返其真魂兮歸來嗟
悲夫古稱不朽曾幾何人餘子混然蓬蒿
孰貴孰賤誰富誰貧同歸烏有寄樂

發社學訓童蒙口語

爾童蒙勿自弃勤讀書端寫字做好人
入則孝出則弟究古今談道義慎語言定心
節飲食薄滋味飭威儀莊動履坐不偏立不
高拱手深作揖友勝己莫相忌投明師謹隨
疑思問問須記過必改莫自恃莫怠惰莫嬉戲
莫好奕莫貪利莫邪思莫淫視莫凌人莫闖氣
莫艱深莫狐媚莫詆毀莫放肆莫但期三公位
爲聖賢亦容易聖賢心無甚異舜何人希則是

聽吾言成大器

弔溺文

陳關元董福胡友杜進受四夫役溺死
橫梁江予痛其斃於非命也爲文以弔
之

其詞曰嗚呼人孰無役爾之役也受此殃人孰
不死爾之死也有餘傷江樹蒼蒼江水茫茫爾
之云亡乃與魚鼈爲鄉烏得不痛予衷腸也雖
然賢如李猶沉於采石忠如屈亦厄於沅湘念

至折天命之何常招爾魂兮歸來風

高粱投爾菜羹爾其格嘗嗚呼哀哉

建關廟動土文

惟神大義匡時精忠貫日威宣夷夏氣攝奸雄
血食茲邦士民未賴惟職失德召此灾星延及
闕庭盡成煨燼仍資冥力旋致反風雖罹天災
實蒙神庇敢忘修建以答庥嘉特諏吉辰肇興
工作伏祈默佑俾有成功庶廟貌重新壯觀萬
禩威靈有赫錫福兆民

戲爲陸藝彈白黑子文

孔門從事陸藝爲懇乞聖明速祛竒僻杜詭道以彰國法以正人心事臣伏以君子脩厥身必資物以養德聖人立成器皆有益於斯民賤若犁鉏乃禪稼穡文如筆石實佐辭章如臣等最極於么麼而聖門通之者七十不作無益用以成賢竊見雜局供奉白黑子磊塊下材縱衡賤士機關叵測出沒無常藏身方罟之間惟恐人之勝已依據楸枰之內率用術以凌人無故而啓戰爭陰謀以圖劫殺決勝負死生於反掌萃克伐怨慾于一時貪得無厭肆行罔忌出入博徒之懷袖妄言堯藉之以教丹朱依倚貪夫爲腹心詫說秋師之以名夷夏扁六曲四黨類殊繁馬步猴伸名號匪一迷魂奪魄令賢智者變而爲愚廢事失時俾顯蒙者愈滋其惑學術不講職此之由衣物或輸是誰之過故惡其媚者謂爲木野狐而鄙其爲者稱爲牧猪戲以希賢無當衆藝用致身不如一經林逋薄之不爲章

驩以爲深戒乃是子猶連茹當路時或自挺其
梟雄明目班行僉謂並遭乎異數頑如石而慢
客幻若鬼以欺人再照白黑子稟性姦貪賦質
圓滑猥以手談之小數敢竊坐隱之芳名不思
非義而弗爲惟知行險以僥倖妄修邊幅私擅
攻圍賭郡而事上不恭爛柯則使人廢業曠若
蘇軾亦喜觀其敗倦如到漑嘗因彼致嘲如此
橫行大乖直道有傷國紀實壞人心懇乞聖明
將白黑子亟行廉問早賜擯斥則天下幸甚臣
愚幸甚

芝園文稿卷之九終